



Nuuk, d. 28. August 2015

Inatsisartut Suleriaasianni § 37 naapertorlugu Naalackersuisunut apeqqut imaattoq matumuuna saqqummiuppara:

### **Naalackersuisunut apeqqut:**

1. Ulloq suna Naalackersuisut siulittaasuannut Kim Kielsenimut Nunanullu allanut Naalackersuisumut Vittus Qujaukitsumut eqqartuussissuserisumit nalunaarusiaq nassiunneqarpa?
2. Naalackersuisut Inatsisartunit nalunaarutip pinissaa pillugu saaffigineqarpat? Saaffigineqarsimappata tamanna qanga piva?
3. Sooq Naalackersuisunit Inatsisartunut nassiussiniarneq taama sivitsortigiva?
4. Naalackersuisut nalunaarusiaq Inatsisartunut nassiutissamaarpat?
5. Naalackersuisut nalunaarusiap ilaa nalunaarusiarluunniit tamaat avammut saqqummiutissamaarpat?
6. Naalackersuisut nalunaarusiap inernerisaanut pillugu qanoq eqqarsaatersuuteqarpat isumaqarpallu?
7. Eqqartuussissuserisumut misissuititsineq tamakkiisumik qanoq akeqarsimava?

### **Tungavilersuut:**

Naalackersuisut eqqartuussissuserisumut Pituffimmi kiffartuussinermut isumaqatigiissummik annaasaqarneq pullugu misissuititsinerat qangali naammassillunilu Naalackersuisunut tunniutereerpoq. Tamanna eqqartuussissuserisup pineqartup nittartagaani atuarneqarsinnaavoq, tassanimi allassimavoq Naalackersuisut siulittaasuannut Kim Kielsenimut Nunanullu allanut Naalackersuisumut Vittus Qujaukitsumut juulip 7-ni 2015 tunniunneqarsimasoq.

Taamaakkaluartoq maanna qaammatit marluk ingerlasimaleraluartut Inatsisartuni eqqartuussissuserisup misissuisimaneranit nalunaartut takuneqanngilaq, naak Inatsisartut martip 19-ni Inuit Ataqatigiit oqallisissiaata kingunerisaanik partiit tamakkerlutik akuersaagannik oqaaseqaataannut tamanna akerliugaluartoq.

Oqaaseqaat ilaatigut ima imaqarpoq:

*"Inatsisartut immikkut soqutigilluinnarlugu utaqqimaarpat, Thule Airbasemi sullissinermi isumaqatigiissutip annaaneqarnera pillugu eqqartuussissuserisut misissuinerata naammassinissaa. Inatsisartut Naalackersuisunut sakkortuumik kajumissaarutigissavaat, eqqartuussissuserisut misissuinerata naammassinera Inatsisartunut innuttaasunullu saqqummiunneqassasoq."*

Eqqartuussissuserisumik misissuititsinerup naammassisimanagera nalunaarutigineqarmat ingerlaannaq Inatsisartuni Nunanut allanut sillimaniarnermullu ataatsimiititaliamut piumasaraara ataatsimiititaliamit misissuinermit nalunaarut Naalackersuisunit piutaneqassasoq. Ullumikkulli paasinarsivoq nalunaarut suli Inatsisartunut nassiunneqarsimanngitsoq. Tamanna naammaginangilaq Naalackersuisullu Inatsisartut oqaaseqaataannik ataqqinninnginnerannik takutitsisutut isigaara.

Inuit Ataqatigiit aallaqqaataaniilli misissuititsinermik inniminniisoqarmalli misissuititsinerup illuinnaasiunngittumik ingerlanneqarnera apeqquserlugu isornartorsiuisarput.

Uanili pineqartoq tassaangilaq misissuititsineq illuinnaasiorpallaarsimanerneranik apeqqut. Pineqartoq tassaavoq Naalakkersuisut Inatsisartut oqaaseqaataat ataqqillugu Naalakkersuisut suliniarnersut aammalu innuttaasunut ammasumik suleriaaseqarniarnermik neriorsuutertik attanniarneraat.

Naatsorsuutigaara eqqartuussissuserisup suliani pimoorullugu illuinnaasiorpalaanngittumillu suliarisimassagaa. Aamma isumaqarpunga nalunaarut taama ittoq Inatsisartuni ataatsimiititaliamut attuumassuteqartunut ingerlaannartumik nassiunneqartariaqartoq, soorlu aamma innuttaasut nalunaarusiorneq aningaasartuutaasimasoq qanoq inerninerneqarsimanerneranik paasisaqarnissaminnut pisinnaatitaaffeqartut.

Apeqqutit ullut suliffiit qulit qaangiutsinnagit akineqarnissaat kissaatigaara.